

Trankilidat den Tempestat

Hopi hende ta spantá! Problema di kompiuter kousá pa e kambio di milenio tin nan preokupá. Nan tin miedu pa ku pronostiko di fin di mundu. I ken sa kiko por pasa awor ku nos ta den temporada di orkan? Nan ta ku man na kabes pa motibu di Kick ‘em Jenny i un pusíbel maremoto.

Ku esaki en bista, nota un storia den Beibel (Mateo 8:23-27). “*I ora ku El (Hesus) a bai den e boto, Su disipelnan a siguiE. I mira, a lanta un tempestat pisá riba laman, asina ku e olanan tabata tapa e boto; ma E mes tabata na soño. I Su disipelnan a bin serka djE i a lant'E for di soño, bisando: "Señor, salba nos, nos ta peresé!" I El a bisa nan: "Pakiko boso tin miedu, boso, hendenan di poko fe?" E ora ei El a lanta i a reprendé e bientunan i e laman; i a bira kompletamente kalmo. I e hendenan a keda atmirá, bisando: "Ki sorto di hende esaki ta, ku asta bientunan i laman ta obedes'E?"*

Nota tres punto den e storia aki ku por yudábo enfrentá tempestatnan den bida:

1) Tempestatnan den bida sa bin pa esnan ku ta sigui Kristo. Ta un echu ku hende ku ta ignorá e Manual di bida, Palabra di Dios, en general lo haña nan den muchu mas skual (mes sigur ku hende ku ta ignorá manual di outo lo tin muchu mas problema ku outo). Ma no ta nan so! Hende ku ta bon siguidó di Kristo tambe ta haña nan ku problema (p.e. pèrdè trabou, sèn no ta yega, kolega ta gaña riba bo, enfermedat, frakaso, keda sinta, èts). Tempestatnan di bida ta bin pa tur!

Segun Mateo 8:18, Hesus mes a duna òrdu pa dreña boto i pasa pa otro banda di Laman di Galilea. **Esnan ku a obedes'E a haña nan den un tempestat!** Hesus tabata sa kiko nan lo haña nan aden! E por a prevení e tempestat. Ma E no a hasi'è.

Si Dios no ta protehá Su siguidónan di problema, kiko ta e benefisio di biba conforme ku Beibel? Un benefisio sigur ta...

2) Tempestatnan den bida por ta kompañia pa pas mental. Boto tabata zeilu den e olanan brabu i bientu ferós, yenando ku awa. E piskadónan eksperensiá tabata desesperá, sabiendo ku nan ta bai hundi. Ma Hesus—ku lo tabata papa muhá—tabata morto na soño! Inkríbel! **E por a drumi trankil pasobra E tabata sa ku Dios Tata tin tur kos bou di kontrol!**

Si bo ta konfia Dios di bèrdat, bo por tin pas mental apesar di e tempestat feros! No tur ora Dios ta protehá nos for di tempestatnan den bida. Ma E por duna nos pas den e tempestat!

Si bo nunca a konfia Kristo pa salvábo for di e kastigu ku bo ta meresé na fièrnu pa bo piká, bo tin rason pa tin miedu—asta pániko—pa ku orkan, maremoto, problema di kompiuter, èts. Den un será di wowo bo por pèrdè tur kos, asta bo bida. Ma esun ku ta konfiando Kristo sa ku Dios no ta bandon'è. I si e muri, e ta serka Dios. Manera apòstel Pablo a bisa “*Pasobra pa mi, biba ta Kristo, i muri ta ganashi*” (Filipensenan 1:21).

3) Tempestatnan den bida ta un oportunitat pa Dios siña nos un les. Ora Hesus a spierta, El a dirigí Su promé palabranan na Su disipelnan: “*Pakiko boso tin miedu, hendenan di poko fe.*” Hesus a laga sa ku no tin nodi pa nan tin miedu! Di bèrdat, Su pregunta ta indiká e kontesta. **Nan tin miedu pasobra nan no ta konfia Dios! Konfiansa den Dios ta ekskluí miedu. I miedu ta ekskluí konfiansa den Dios.**

Despues, “*El a reprendé e bientunan i laman; i a bira kompletamentu kalmo*”. Nan a kuminsá komprendé ku Hesus mester ta Dios pa hasi esaki. Unda ku Hesus ta, tempestatnan di bida por bira kalmo. Den e problema mas duru di bida, por tin pas den bo kurason pa motibu di Hesus Su presensia.

Bo tin miedu pa futuro? Usa bo sintí i tuma prekoushonnan nesario. Ma na e mes tempu, konfia Kristo pa bida eterno serka dj'E i konfi'E pa duna pas mental enfrentando e tempestat.